

四庫全書

子部

欽定四庫全書

子部

西山讀書記卷三十四下

詳校官中書_臣孫球

刑部郎中_臣許兆椿覆勘

總校官庶吉士_臣侍朝

校對官庶吉士_臣陳崇本

謄錄監生_臣薛翰

欽定四庫全書

西山讀書記卷三十四下

辭受

書大禹謨禹拜稽首固辭

論語子華使於齊冉子為其母請粟子曰與之釜請益
曰與之庾冉子與之粟五東子曰赤之適齊也乘肥馬
衣輕裘吾聞之也君子周急不繼富原思為之宰與之

宋 真德秀 撰

粟九百辭子曰毋以與爾鄰里鄉黨乎

朱子曰毋禁止辭言常祿不當辭有餘自可推之以
周貧乏蓋鄰里鄉黨有相周之義○程子曰夫子之
使子華子華之為夫子使義也而冉子乃為之請聖
人寬容不欲直拒人故與之少所以示不當與也請
益而與之亦少所以示不當益也求未達而自與之
多則已過矣故夫子非之蓋赤苟至乏則夫子必自
周之不待請矣原思為宰則有常祿思辭其多故又

教以分諸鄰里之貧者蓋亦莫非義也張子曰於斯二者可見聖人之用財矣。南軒曰聖人於子華謂周急不繼富於原思謂毋以與爾鄰里鄉黨蓋取子辭受莫不有其則焉天之理也聖人從容而不過賢者審處而不違若以私意加焉則失其權度或與其所不當與雖賢於吝然未免為傷惠或辭其所不當辭雖賢於貧亦未免為有害於廉矣。黃氏曰冉子之與粟不害其為惠原思之辭粟不害其為廉自常

人觀之皆善行也聖人處事如化工生物洪纖高下各適其宜又豈但可見其用財而已哉

孟子陳臻問曰前日於齊王餽兼金一百而不受於宋餽七十鎰而受於薛餽五十鎰而受前日之不受是則今日之受非也今日之受是則前日之不受非也夫子必居一於此矣孟子曰皆是也當在宋也予將有遠行行者必以贍辭曰餽贍予何為不受當在薛也予有戒心辭曰聞戒故為兵餽之予何為不受若於齊則未有

處也無處而餽之是貨之也焉有君子而可以貨取乎
尹氏曰言君子之辭受取予惟當於理而已○南軒
曰凡人所以遲回於辭受之際者以為外物所動故
也蓋於其所不當受而受其動於物固也若於所當
受而不受是亦為物所動而已矣何則以其蔽於理
而見物之大也若夫聖賢從容不迫惟義之安而外
物何有乎故以舜受堯之天下而不為泰亦曰義當
然爾若於義也無居則雖簞食豆羹不可取也簞食

豆羹之與天下其大小固有間矣物則有大小而義之所在則一也

孟子致為臣而歸王就見孟子曰前日願見而不可得
得侍同朝甚喜今又棄寡人而歸不識可以繼此而得
見乎對曰不敢請耳固所願也他日王謂時子曰我欲
中國而授孟子室養弟子以萬鍾使諸大夫國人皆有
所矜式子盍為我言之時子因陳子而以告孟子陳子
以時子之言告孟子孟子曰然夫時子惡知其不可也

如使子欲富辭十萬而受萬是為欲富乎季孫曰異哉
子叔疑使己為政不用則亦已矣又使其子弟為卿人
亦孰不欲富貴而獨於富貴之中有私龍斷焉古之為
市者以其所有易其所無者有司者治之耳有賤丈夫
焉必求龍斷而登之以左右望而罔市利人皆以為賤
故從而征之征商自此賤丈夫始矣

程子曰齊王所以處孟子者未為不可孟子亦非不
肯為國人矜式者但齊王實非欲尊孟子乃欲以利

誘之故孟子拒而不受。○南軒曰孟子之意以為不
用已則已矣而又欲養弟子以卿之祿則是王之處
已也以利而非為道之故吾之受之亦利之而已苟
以利則何異於龍斷之夫乎人孰不欲富貴此言人
情之常也謂賢者獨不欲則豈人情哉聖賢固欲道
之行也而動必以義義所不安則處貧賤而終身可
也其可以利誘乎嗟乎義利之幾君子之所深謹而
去就之所由分也後世為人臣者不明斯義故為之

君者謂利祿之果可以得士而士之所以求於我者亦不過乎此於是而有輕下自驕之心正猶征商之法因龍斷之夫而立耳夫惟君子守義而不苟就所以明為人臣之義也

彭更問曰後車數十乘從者數百人以傳食於諸侯不以泰乎孟子曰非其道則一簞食不可受於人如其道則舜受堯之天下不以為泰子以為泰乎曰否士無事而食不可也曰子不通功易事以羨補不足則農有餘

粟女有餘布子如通之則梓匠輪輿皆得食於子於此
有人焉入則孝出則悌守先王之道以待後之學者而
不得食於子子何尊梓匠輪輿而輕為仁義者哉曰梓
匠輪輿其志將以求食也君子之為道也其志亦將以
求食與曰子何以其志為哉其有功於子可食而食之
矣且子食志乎食功乎曰食志曰有人於此毀瓦畫墁
其志將以求食也則子食之乎曰否曰然則子非食志
也食功也

南軒曰孟子當戰國之時以身任道其歷聘諸國後車數十乘從者數百人夫豈尊已而自大乎哉亦時義所當然有不得而避也彭更之徒疑傳食以為泰是以世俗利害貴賤之見觀聖賢也孟子之所以告之者蓋常道耳夫非其道則一簞食不可受於人如其道則舜受堯之天下而不以為泰所謂其道者天理之所安也故伯夷叔齊不食周粟之心即舜禹受天下之心也而孟子後車數十乘從者數百人以傳

食於諸侯之心即顏子一簞食一瓢飲在陋巷之心也皆以其道故也以為士無事而食不可觀更之意亦許行之類與孟子又從而曉之以為使子而不通功易事則農之餘粟女之餘布無所用之而人之饑寒者亦多矣此固不可也子而通功易事則梓匠輪輿固得以其技而食於子矣今有賢者而反不得食於子是子以梓匠輪輿為有用而尊之以仁義者為無用而輕之也

匡章曰陳仲子豈不誠廉士哉居於陵三日不食耳無聞目無見也井上有李蠶食實者過半矣匍匐往將食之三咽然後耳有聞目有見

匡章陳仲子皆齊人廉有分辨不苟取也

孟子曰於齊國之士吾必以仲子為巨擘焉雖然仲子惡能廉充仲子之操則蚓而後可者也

巨擘大指也言齊人中有仲子如衆小指中有大指也充推而滿之也操所守也蚓丘蚓也言仲子未得

為廉也必若滿其所守之志則惟丘蚓之無求於世
然後可以為廉耳

夫蚓上食槁壤下飲黃泉仲子所居之室伯夷之所築
與抑亦盜跖之所築與所食之粟伯夷之所樹與抑亦
盜跖之所樹與是未可知也

槁壤乾土也黃泉濁水也抑發語辭也言蚓無求於
人而自足而仲子未免居室食粟若所從來或有非
義則是未能如蚓之廉也

曰是何傷哉彼身織屨妻辟纊以易之也

辟績也纊練麻也

曰仲子齊之世家也兄戴蓋祿萬鍾以兄之祿為不義之祿而不食也以兄之室為不義之室而不居也辟兄離母處於陵他日歸則有饋其兄生鵝者已頻顙曰惡用是醜醜者為哉他日其母殺是鵝也與之食之其兄自外至曰是醜醜之肉也出而哇之

世家世卿之家兄名戴食米於蓋其入萬鍾也歸自

於陵歸也已仲子也鵲鵲鵲聲也頻顙而言以其兄受饋為不義也哇吐之也

以母則不食以妻則食之以兄之室則弗居以於陵則居之是尚為能充其類也乎若仲子者蚓而後充其操者也

言仲子以母之食兄之室為不義而不食不居其操守如此至於妻所易之粟於陵所居之室既未必伯夷之所為則亦不義之類耳今仲子於此則不食不

居於彼則食之居之豈為能充滿其操守之類者乎
必其無求自足如丘蚓然乃為能滿其志而得為廉
耳然豈人之所可為哉。范氏曰天之所生地之所
養惟人為大人之所以為大者以其有人倫也仲子
辟兄離母無親戚君臣上下是無人倫也豈有無人
倫而可以為廉哉。南軒曰於陵仲子於其所當享
有所不安引而避之而其窮至於無以食而食井上
之螯李在當時或稱其廉雖其能不以一介取諸人

也曾不知伊尹之不以一介與人不以一介取諸人
以非其義非其道之故耳若於其所當居而不居則
反害於道義矣仲子齊之世家兄戴蓋祿萬鍾仲子
苟以為不當虛享其祿食則當與其兄共思社稷之
計光輔其主治其國家保其民人則齊國有無窮之
業而仲子之家亦有無窮之聞斯為稱焉耳今乃昧
正大之見為狹陋之思以食粟受鵝為不義而不知
避兄離母之為非徒欲潔身以為清而不知廢人倫

之為惡小廉妨大德私意害公義原仲子本心亦豈
不知母子之性重於其妻兄之居為愈於陵乎惟
其私意所萌亂夫倫類至此極也衆人惑於其迹以
其清居高介而取之而不知原其所萌若是其差殊
也嗟乎世之貪冒苟得肆而為惡者多矣而孟子於
仲子之徒獨闢之之深者蓋世之為惡者其失易見
而仲子之徒其過為難知也惟其難知故可以惑世
俗而禍仁義孟子反覆闢之蓋有以也

孟子曰可以取可以無取取傷廉可以與可以無與與傷惠可以死可以無死死傷勇

林氏曰公西華受五秉之粟是傷廉也冉子與之是傷惠也子路之死於衛是傷勇也○朱子曰先言可以者畧見而自許之辭後言可以無者深察而自疑之辭○南軒曰取與死生之義有灼然易判者亦有在可否之間者在可否之間非精義者莫之能擇也盖其幾間不容息一或有偏則失之矣是以君子貴

乎存養存之有素則其理不昧養之有素則物莫能奪夫然故當事幾之來有以處之而得其當也孟子於齊餽兼金而受其於宋疑可受而不受盖以其無取而餽之則為傷廉故耳孔子於公西華之使冉子為之請粟疑可與也而不與盖以周急不繼富而與之則傷惠故耳至於比干諫而死箕子疑亦可死也而佯狂以避盖以父師之義死之則為傷勇故也然在賢者則於不可之間能擇而處之在聖人則動

無非義更不言擇矣雖然取之為傷廉固也然與為
傷惠死為傷勇何哉蓋所謂惠與勇者以其義之所
在故耳若義所不存雖似惠似勇而反害於惠勇之
實且於所不當然而然則於其所當然者廢矣豈不
為有害乎

萬章問曰敢問交際何心也孟子曰恭也曰卻之卻之
為不恭何哉曰尊者賜之曰其所取之者義乎不義乎
而後受之以是為不恭故弗卻也曰請無以辭卻之以

心卻之曰其取諸民之不義也而以他辭無受不可乎
曰其交也以道其接也以禮斯孔子受之矣

朱子曰萬章以為彼既得之不義則其餽不可受但
無以言語間而卻之直以心度其不義而托於他辭
以卻之如此可否耶交以道如餽贐聞戒周其饑餓
之類接以禮謂辭命恭敬之節孔子受之如受陽貨
蒸豚之類也

萬章曰今有禦人於國門之外者其交也以道其餽也

以禮斯可受禦與曰不可康誥曰殺越人于貨閔不畏死凡民罔不誨是不待教而誅者也殷受夏周受殷所不辭也於今為烈如之何其受之曰今之諸侯取之於民也猶禦也苟善其禮際矣斯君子受之敢問何說也曰子以為有王者作將比今之諸侯而誅之乎其教之不改而後誅之乎夫謂非其有而取之者盜也充類至義之盡也孔子之仕於魯也魯人獵較孔子亦獵較獵較猶可而況受其賜乎

言今諸侯之取於民固多不義然有王者起必不連
合而盡誅之必教之不悛而後誅之則其與禦人之
盜不待教而誅者不同矣夫禦人於國門之外與非
其有而取之二者固皆不義之類然必禦人乃為真
盜其謂非有而取為盜者乃推其類至於義之至精
至密之處而極言之耳非便以為真盜也然則今之
諸侯雖曰取非其有而豈可遽以同於禦人之盜也
哉又引孔子之事以明世俗所尚猶或可從況受其

賜何為不可乎獵較未詳趙氏以為田獵相較奪禽獸以祭孔子不違所以小同於俗也張氏以為獵而較所獲之多少也二說未知孰是

曰然則孔子之仕也非事道與曰事道也事道奚獵較也曰孔子先簿正祭器不以四方之食供簿正曰奚不去也曰為之兆也兆足以行矣而不行而後去是以未嘗有所終三年淹也

兆猶卜之兆蓋事之端也孔子所以不去者亦欲小

試行道之端以示於人使知吾道之果可行也若其
端既可行而人不能遂行之然後不得已而必去之
蓋其去雖不輕而亦未嘗不決是以未嘗終三年留
於一國也

孔子有見行可之仕有際可之仕有公養之仕於季桓
子見行可之仕也於衛靈公際可之仕也於衛孝公公
養之仕也

見行可見其道之可行也際可接遇以禮也公養國

君養賢之禮也。季桓子魯卿季孫斯也。衛靈公衛侯元也。孝公春秋史記皆無之。疑出公輒也。因孔子仕魯而言其仕有此三者。故於魯則兆足以行矣。而不行然後去。而於衛之事則又受其交際問饋而不卻之一驗也。尹氏曰。不聞孟子之義則自好者為於陵仲子而已。聖賢辭受進退惟義所在。○南軒曰。讀孟子此章所以答萬章者。反覆曲折可謂義之精矣。問交際何心。則曰恭。蓋交際之道主乎恭也。問卻之何

以為不恭則以謂尊者有賜若念其取之義與不義而後受則非所以敬事其尊者也吾知不虛其賜我之意而已豈暇問其所自哉若夫萬章之說以心卻之而以他辭無受則是乃不恭之心而辭何為乎然而其受也必交以道而接以禮使交之不以道而接之不以禮則固有所不受矣於齊餽兼金百鎰而不受是亦尊者之賜也然未有辭則是貨我而已其交也固非道其接也固非禮然所為不受也蓋亦非為

其取之不義之故初亦無害乎交際之恭也萬章於此有疑焉謂有人於此禦人以兵而得貨然交以道餽以禮則君子固亦受與孟子謂禦人而奪貨者此所謂大慙有國者之所必禁不待教令而誅者三代之法同不必設辭而可知者居今之世其法為甚著奈何而可受其餽乎萬章謂既以為不可則今之諸侯以非道取民與此何異而君子以善其禮際而受之可乎孟子謂事固有輕重若以為有王者作將不

待教而盡誅今之諸侯乎抑亦教而不改而後誅之
也以理論之則必待教而不改然後誅之明矣然則
其可與不待教而誅者同日而語乎夫謂非其有而
取之為盜者蓋充夫非其有而取之之類以極義之
所在而比之為盜則可若使以為與禦人奪貨之盜
同罪則豈可哉大抵聖賢因汙隆而起變化辭受取
予皆天下正理過與不及為失其正理則均也魯之
習俗必獵較而後以祭孔子仕於魯亦不違也而况

於受其賜乎萬章聞是言則又疑孔子之仕所事者
道而何獵較為也孟子以為孔子於宗廟之祭先薄
正其祭器立之義典不以四方之食供薄正蓋四方
之食非薄正之常典故也然於獵較而供祭之事猶
有所未廢蓋由薄正之事而正之其施設則有次第
矣而萬章以為既不能遂盡正之則曷為不遂去孟
子謂為之兆也為之兆者正本開端而為可繼者也
聖人之為如天地之化不疾不徐雖曰為之兆而化

育之大體已具矣在他人緩則失時速則反害盖非
溥博淵泉而時出之是以無序而不和也兆足以行
而不行者盖以其兆固可繼此以行而有所不得行
焉則命也夫然後去之故亦未嘗有三年之淹焉其
先後遲速皆天理也此所謂聖之時者歟於是遂論
孔子之仕有三焉見行可之仕謂其兆可以行者也
際可之仕謂遇聖人以禮者也公養之仕謂養聖人
以道者也遇以禮而養以道者聖人亦豈得而絕之

乎讀是書者涵咏而精思之亦可以窺聖賢之用而知辭受取予之方也

孟子曰仕非為貧也而有時乎為貧娶妻非為養也而有時乎為養為貧者辭尊居卑辭富居貧

朱子曰貧富謂祿之厚薄蓋仕不為道已非出處之正故其所處但當如此

辭尊居卑辭富居貧惡乎宜乎抱關擊柝

為貧者雖不主於行道而亦不可以苟祿故惟抱關

擊柝之吏位卑祿薄其職易稱為所宜居也李氏曰
道不行矣為貧而仕者此其律令也若不能然則是
貪位慕祿而已矣

孔子嘗為委吏矣曰會計當而已矣嘗為乘田矣曰牛
羊茁壯長而已矣

此孔子之為貧而仕者也茁肥貌言以孔子大聖而
嘗為賤官不以為辱者所謂為貧而仕官卑祿薄而
職易稱也

位卑而言高罪也立乎人之本朝而道不行恥也

以出位為罪則無行道之責以廢道為恥則非竊祿之官此為貧者之所以必辭尊富而寧處貧賤也尹氏曰言為貧者不可以居尊居尊者必欲以行道○南軒曰此章言為貧而仕之義夫仕者豈為貧乎哉蓋將以行道也而亦有為貧而仕者焉是猶娶妻本為繼嗣非為養也而亦有為養而娶者焉然則為貧而仕與為養而娶是亦皆義也雖然既曰為貧矣則

不當處乎尊與富居於卑與賤者可也若處其尊與富則是名為為貧而其實竊位也處其尊與富則當任其責此豈為貧之地哉是則非義矣故抱關擊柝亦以為宜者本為貧故也孔子嘗為委吏與嘗為乘田矣聖人篤誠雖居下位必敬其事曰會計當而已矣曰牛羊茁壯長而已矣以其職在乎是而不越也蓋位卑者言責不加焉言高則罪矣故可以姑守其職此為貧而仕之法也若夫立人之本朝則當以行

道為任道不行而竊其位君子之所恥也然則高位厚祿非所以養貧也後世不明此義假為貧之名安享寵利而居然曾不以為愧此可勝罪哉必不得已為貧而仕其抱關擊柝之為宜則可矣嗟夫觀夫子為委吏而曰會計當而已矣為乘田而曰牛羊茁壯長而已矣則夫子得政於天下其所當為者如何哉事有大小而心則一也亦曰止其所而已矣

萬章曰士之不託諸侯何也孟子曰不敢也諸侯失國

而後託於諸侯禮也士之託於諸侯非禮也萬章曰君
餽之粟則受之乎曰受之受之何義也曰君之於氓也
固周之曰周之則受賜之則不受何也曰不敢也敢問
其不敢何也曰抱關擊柝者皆有常職以食於上無常
職而賜於上者以為不恭也曰君餽之則受之不識可
常繼乎曰繆公之於子思也亟問亟餽鼎肉子思不悅
於卒也標使者出諸大門之外北面稽首再拜而不受
曰今而後知君之犬馬畜伋蓋自是臺無餽也悅賢不

能舉又不能養也可謂悅賢乎曰敢問國君欲養君子如何斯可謂養矣曰以君命將之再拜稽首而受其後廩人繼粟庖人繼肉不以君命將之子思以為鼎肉使已僕僕爾亟拜也非養君子之道也堯之於舜也使其子九男事之二女女焉百官牛羊倉廩備以養舜於畎畝之中後舉而加諸上位故曰王公之尊賢者也

朱子曰能養能舉悅賢之至也惟堯舜為能盡之而後世之當法也○南軒曰萬章所謂託於諸侯盖以

為士雖不得行其道而託祿於諸侯以自養宜若可也而孟子以為非禮以其無是理故也然周之則可以受周之與賜所以異者蓋居其國則為其民君以其饑餓而餽焉受斯可也若欲以自託而虛享其祿賜則於義何居乎名不正則失其序而不和故孔子論之至於禮樂不興而民無所措手足君子之於禮樂不斯須去身者其動未嘗不名正而言順故也曰不敢者以其無常職而受賜陷於不恭故不敢也雖

然此上之所以自處者當然也在國君之待士則有
養賢之禮焉故舉子思之事以告之夫子思受繆公
之餽者周之而受之義也至於餽之之久而僕僕然
亟拜則是徒為餽而已徒為餽則與養犬馬之道何
異烏有君子而受其犬馬之畜者乎故及其久也則
再拜稽首而不受蓋繆公雖有悅賢之名不能舉而
用又不能以禮養之也賢者其肯處乎以禮養者繼
肉是也蓋不敢以是而數屨之故使繼之而已雖然

此及乎養之之禮而未及乎舉之之道也若堯之於舜則尊賢之極而養道之盡也事之以九男女之以二女百官牛羊倉廩脩而養之於畎畝之中惟恐不能當其意一旦舉而加諸上位如是而後可以謂之王公之尊賢也孟子每以堯舜之事為言者語道者必稽諸聖人所以示萬世之準的蓋聖人人倫之至故也嗟乎為士者於辭受之際可不思夫名正而言順者乎為君者之待士又何可不深思所以養之之

道乎

孟子曰仲子不義與之齊國而弗受人皆信之是舍簞食豆羹之義也人莫大焉亡親戚君臣上下以其小者信其大者奚可哉

朱子曰言仲子設若非義而與之齊國必不肯受齊人皆信其賢然此但小廉耳其辟兄離母不食君祿無人道之大倫罪莫大焉豈可以小廉信其大節而遂以為賢哉○南軒曰簞食豆羹得之則生弗得則

死嘯爾而與之則不受謂斯人也一旦而遇萬鍾之
祿苟惟不義則必不受也可乎盖人之難知也以其
小者信其大者固不可也於陵仲子以兄之祿為不
義辟兄離母處於於陵齊高之以謂若斯人者不義
而與之齊國亦將必不受也孟子以為是倉庫食豆
羹之義也盖孟子以人倫之際察之而知其不可信
也人之所以為人者莫大於人倫所謂親戚君臣上
下是也今仲子廢親戚君臣上下而欲以潔其身飾

小廉而妨大德其不知義固已甚矣又惡能不受不義之齊國乎古之善觀人者必於人倫之際察之而
其人之得失淺深可概見矣四岳之舉舜則曰克諧
以孝而已堯之降舜以二女觀其嬪于虞而已此舜
之所以聖也冀缺與其妻相待如賓而臼季知其能
治民茅容殺牲先奉其母而郭林宗知其可以成德
是亦善觀人者也若仲子廢大倫而徇私意以其小
廉信其大節烏乎可哉

孟子曰食而弗愛豕交之也愛而弗敬獸畜之也恭敬者幣之未將者也

朱子曰將猶奉也詩曰承筐是將程子曰恭敬雖因威儀幣帛而後發見然幣帛之未將時已有此恭敬之心非因幣帛而後有也

恭敬而無實君子不可虛拘

此言當時之待賢者特以幣帛為恭敬而無其實也拘留也。南軒曰此章言交際之道夫徒食之而愛

心不加焉徒愛之而敬心不加焉則與豕交獸畜無以異蓋人道之相與以敬為主夫必有是恭敬而後幣帛以將之蓋恭敬者先存於幣帛未行之前者也若無是恭敬則幣帛何所施乎雖然幣帛者所以將其恭敬者也恭敬存於中而儀物實於外此君子之道又以為內外之宜文質之中也若恭敬之心雖存而無以實之於外君子亦惡夫虛拘也昔夫子解駟以賻舊館人之喪曰吾惡夫哀之無從蓋是意也夫

古人於交際之道豈苟然哉蓋有燕享之禮焉有摯獻之禮焉有問遺之禮焉此皆其恭敬之所生也恭敬為主而其節文品式森然脩具而又有貴賤貧富之不同大小多寡之或異是皆人之所為也若昧乎此不陷於豕交獸畜則或失之虛拘皆非君子之道也○二先生釋恭敬無實之語不同正當參考孟子居鄒季任為仕處守以幣交受之而不報處於平陸儲子為相以幣交受之而不報

趙氏曰季任任君之弟任君朝會於鄰國季任為之
居守其國也儲子齊相也不報者來見則當報之但
以幣交則不必報也

他日由鄒之任見季子由平陸之齊不見儲子屋廬子
喜曰連得間矣

朱子曰屋廬子知孟子之處此必有義理故喜得其
間隙而問之

問曰夫子之任見季子之齊不見儲子為其為相與

言儲子但為齊相非若季子攝守君位故輕之耶

曰非也書曰享多儀儀不及物曰不享惟不後志于享書洛誥篇享奉上也儀禮也物幣也役用也言雖享而禮意不及其幣則是不享矣以其不用志於享故也

為其不成享也

孟子釋書意如此

屋廬子悅或問之屋廬子曰季子不得之鄒儲子得之

平陸

徐氏曰季子為君處守不得往他國以見孟子則以幣交而禮意已脩儲子為齊相可以至齊之境内而不來見則雖以幣交而禮意不及其物也

孟子曰好名之人能讓千乘之國苟非其人簞食豆羹見於色

朱子曰好名之人矯情干譽是以能讓千乘之國然若本非能輕富貴之人則於得失之小者反不覺其

真情之發見矣蓋觀人不於其所勉而於其所忽然
後可以見其所安之實也○東坡所謂人能碎千金
之璧而不能不失聲於破釜正此意苟非其人其人
指真能讓國者非指好名之人也○問曾會得東坡
之說否曰如此則能讓千乘之國只是好名至簞食
豆羹見於色却是實情也曰然其嘗把此一畧對鄉
為身死而不受一畧蓋此畧是好名之心勝大處打
得過小處漏綻也動於萬鍾者是小處掩瞞得過大

處發露也。○南軒曰：孟子此章言人之度量相越有如是其遠者。夫均是人也，而有讓千乘之國者，有與人簞食豆羹而德見於色者，何其不侔也？蓋其所存有厚薄，而所見有廣狹之故耳。夫能讓千乘之國，亦可謂高矣。而孟子謂之好名之人者，何哉？蓋未能循天理之實然者，則亦未免為徇其名而已。如季札之徒是也。季子之父兄所以眷眷於季子之立者，為其賢者此公理，而非私意也。而季子三辭焉，是未究夫

當立之義非為季子之大也就隘俗論之可謂超然獨出矣而揆之以道蓋亦好名而蔽其實故也好名之人雖能讓國未免限於名若夫大賢以上循乎天理雖以舜禹受天下受其所當受而不為泰以泰伯之讓夷齊之讓讓其所當讓而不為好名故孔子稱舜禹則曰有天下而不與焉稱泰伯則曰民無得而稱焉稱夷齊曰求仁而得仁聖人之意蓋可見矣○愚按泰伯夷齊之讓與子臧季札之讓其讓則一而

所以讓則不同學者所當究見其義夷齊之事已見前卷求仁章今以泰伯子臧季札之事附見於此。

子曰泰伯其可謂至德也已矣三以天下讓民無得而稱焉。○朱子曰泰伯周太王之長子也至德謂德之至極無以復加者也三讓謂固遜也無得而稱其遜隱微無迹可見也蓋太王三子長泰伯次仲雍次季歷太王之時商道浸衰而周日強大季歷又生子昌有聖德太王因有翦商之志而泰伯不從太王遂

欲傳位季歷以及昌泰伯知之即與仲雍逃之荊蠻
於是太王乃立季歷傳國至昌而三分天下有其二
是為文王文王崩子發立遂克商而有天下是為武
王夫以泰伯之德當商周之際固足以朝諸侯有天
下矣乃棄不取而又泯其迹焉則其德之至極為何
如哉蓋其心即夷齊叩馬之心而事之難處有甚焉
者宜夫子之歎息而贊美之也泰伯不從事見春秋
傳按僖五年宮之奇曰泰伯虞仲大王之昭也泰伯

不從是以不嗣杜氏注曰泰伯虞仲皆太王之子不從父命俱讓適吳。或問曰何以言三讓之為固讓也曰古人辭讓以三為節一辭為禮辭再辭為固辭三辭為終辭故古注至是但言三讓而不解其目也今必求其事以實之則亦無所据矣曰何以言其讓於隱微之中也曰泰伯之讓無揖遜辭受之迹人但見其逃去不返而已不知其讓也知其讓者見其讓國而已而不知所以使文武有天下者實由於此則

是以天下讓也曰其為至德何也曰讓之為德既美矣至於三則其讓誠矣以天下讓則其所讓大矣而又能隱晦其迹使民無得而稱焉則其讓也非有為名之累矣此其德所以為至極而不可以有加也曰太王有廢長立少之意非禮也泰伯又探其邪志而成之至於父死不赴傷毀髮膚皆非賢者之事就使必於讓國而為之則亦過而不合於中庸之德矣其為至德何耶曰太王之欲立賢子聖孫為其道足以

濟天下而非有愛憎之間利欲之私也是以泰伯去之而不以為狷王季受之而不以為貪父死不赴傷毀髮膚而不為不孝蓋處君臣父子之變而不失乎中庸此所以為至德也與魯隱公吳季子之事蓋不同矣曰逃去可矣何必斷髮文身哉曰先儒論之多矣蘇氏以為讓國盛德之事矣然存其實而取其名者亂之所由起故泰伯為此所以使名實俱亡而亂不作也此以利害言之固不足以得聖賢之心而其

弟黃門又曰子貢言泰伯端委以治吳則固未嘗斷
髮文身也且漢東海王以天下授顯宗唐宋王成器
以天下授玄宗皆兄弟終身無間言何必斷髮文身
哉此引子貢之言則其事固有不可考者然以漢唐
二事例之則亦未足以盡聖賢之心也蓋使王季之
心但如顯宗玄宗則可若有叔齊之義則亦不能以
一朝居矣使泰伯而不有以深自絕焉則亦何能必
致國於王季而安其位哉然顯宗玄宗之心其厚薄

又自不同也。○南軒曰：三讓，程子曰：「不立一也，逃之
二也，文身三也。」夫泰伯之讓，誠難知也。以君之元子
而棄宗國以逃，身本中夏而從夷狄之為，不亦冒先
王之大禁與？而泰伯安然行之，非聖人孰能明其為
至德也？至德謂德之至也。泰伯知文王有聖德，天之
所命當使天下被其澤，故致國於王季，為文王也。故
曰：以天下讓，言其至公之心為天下而讓也。變而止
乎中，非達權樂天者，其孰能與於此乎？推其事情深

遠故民無得而稱而聖人獨知其為至德也或曰泰伯之心知文王得國則周必有天下乎非是也以是存心則是利夫天下者也泰伯知文王得國則天下必被其澤也至於周之有天下則泰伯豈加毫末於此哉此又不可以不知也○曹子臧者曹成公之庶子也名欣時宣公之十七年會諸侯伐秦而卒於師曹人使公子負芻守使欣時逆公之喪負芻殺其世子而自立諸侯來討執而歸之京師將以子臧見王

而立之子臧辭曰志有之聖達節次守節下失節為君非吾節也雖不能聖敢失節乎遂逃奔宋明年曹人告於晉請歸負芻而反欣時晉侯謂子臧反吾歸而君子臧反曹伯歸子臧盡置其邑與卿而不出○

吳季札者吳子壽夢之幼子也兄弟四人長曰諸樊次曰餘祭次曰夷昧次曰季札季札賢父欲立之季讓不可則立諸樊諸樊既除喪復欲立季札季札辭曰曹宣公之卒也諸侯與曹人不義曹君將立子臧

子臧去之以成曹君君子曰能守節君義嗣也誰敢
干君有國非吾節也札雖不才願自附於子臧之義
以無失節固立之棄其室而耕乃舍之諸樊十三年
卒有命立餘祭欲以次必致國於季子餘祭四年卒
夷昧立夷昧十七年卒吳人將以先君之命立季子
季子逃去吳人乃立夷昧之子僚云云○蘇氏古史
曰春秋之際世不知義而以權利為貴雖齊桓晉文
皆以爭國成名者也如子臧之於曹季子之於吳皆

有可取之義棄而不顧而況於爭乎予高二子之義
欲考其行事而子臧反國而致事事不復見季子事
吳九十餘年觀其掛劍於墓不以死背其心塋子羸
博不以恩累其志引兵避楚不以名害其德蓋所以
養心者至矣雖祿之天下有所不受而況於吳乎彼
其所養者誠重故也春秋吳子使札來聘胡氏曰札
者吳之公子何以不稱公子貶也辭國而生亂者札
為之也故因其來聘而貶之示法焉按吳子壽夢有

子四人長曰諸樊次曰餘祭次曰夷昧札其季子也
壽夢賢季札欲立以為國札辭不可然後立諸樊既
除喪則致國於季子季子又辭而去之諸樊乃舍其
子而立弟約以次傳必及季子故諸樊卒而餘祭立
餘祭卒而夷昧立夷昧卒則季子宜受命以安社稷
成父兄之志矣乃徇匹夫之介節辭位以逃夷昧之
子僚既立諸樊之子光曰先君所以不與子國而與
弟者凡為季子爾將從先君之命歟則季子宜有國

也如不從先君之命則我宜立僚烏得為君於是使
專諸刺僚而致國乎季子季子不受去之延陵終身
不入吳國故曰季子辭國以生亂因其來聘而貶之
示法焉或謂子貢問於孔子曰伯夷叔齊何人也曰
古之賢人也怨乎曰求仁而得仁又何怨子貢以先
聖賢夷齊知其惡衛輒之爭而不為也季子辭位獨
不為賢而奚貶乎曰叔齊之德不越伯夷孤竹捨長
而立幼私意也諸樊兄弟父子無及季札之賢者其

父兄所為眷眷而欲立札公心也以其私意故夷齊讓國為得仁而先聖之所賢以其公心故季子辭位為生亂而春秋之所貶苟比而同之過矣或曰世衰道微暴行交作臣篡其君者有之子篡其父者有之季子於是焉而辭位則將使聞其風者貪夫廉爭夫讓而篡弑攘奪之禍損矣其於名教豈不有補何貶之深也曰春秋達節而不守者也昔泰伯奔吳而不反季歷嗣位而不辭武王繼統受命作周亦不以配

天之業讓伯邑考官天下也彼王僚無季歷之賢武王之聖而季子為泰伯之讓豈至德乎使爭弑禍興覆師喪國其誰階之也若季子之辭位守節立名全身自牧則可矣概諸聖王之道則過矣中庸曰道之不明不行也我知之矣季子所謂賢且智過而不得其中者也使由於季歷武王之義其肯附子臧之節而不受乎惜其擇乎中庸失時措之宜爾此仲尼所以因其辭國生亂而貶之也或曰吳子使札與楚子

使椒秦伯使術一例爾吳楚蠻夷之國秦介夷狄之間其禮未同於中夏故使人之來皆畧之而札何以獨為貶乎曰春秋多變例聖筆有特書荆楚無大夫而屈完書族王朝下士以人通而子突書字諸侯公子以名著而季友書子母弟之無例者不登其姓名而叔盱書氏皆賢而特書者也季札讓國天下賢之若仲尼亦賢季札必依此例或以字或以氏或以公子特書之矣今乃畧以名紀比於楚椒秦術之流無

異稱焉是知仲尼不以其讓國為賢而貶之也噫世之君子盛稱季札之賢於讓國之際以為禮之大節不可亂也公子喜時春秋猶賢其後世於季札則何獨貶之深也曰仲尼於季子望之深矣責之脩矣惟與天地同德而違乎時中然後能與於此非聖人莫能修之豈不信夫

問今人陳乞恩例於義當然否程子曰只為今士大夫道得个乞字慣動不動又是乞也因問陳乞封父祖如

何曰此事體又別再三請益但云其說甚長待別時說
有問先生夫人不叙封因何先生曰某當時起自草
萊三辭然後受命豈有今日乃為妻求封之理。先
生在講筵嘗質錢用諸公因問必是俸給大段不足
後乃知到任不曾請俸諸公遂牒戶部戶部索前任
厯子先生云某起自草萊無前任厯子舊例初入京
官下狀出給料錢厯其意謂朝廷用人便當廩人繼
粟庖人繼肉也遂令戶部自為出券厯云云後來自

涪陵歸復官半年不曾請俸糧料院吏人忽來索請
券狀子先生云自來不會寫狀子受事人不去只令
子弟錄與受官月日○先生初受命便在假欲逆運
尋醫既而供職門人尹焞深難之謂供職非是先生
曰新君即位首蒙大恩自二千里放回亦無道理不
受某在先朝廷知某者也當時執政大臣皆相知故
不當如此受今則皆無相知朝廷之意只是憐其貧
不使饑餓於我土地某自領官朝廷厚意與受一月

料錢然官則某必做不得既已受它告却不供職是與不受同且畧與供職數日承順它朝廷善意了然後惟所欲

龜山楊氏曰一介之與萬鍾若論利則有多少論義其理一也伊尹惟能一介知所取與故能祿之以天下弗顧繁馬千駟弗視自後世觀之則一介不以與人為太吝一介不以取人為太潔然君子之取與適於義而已與之嗇取之微雖若不足道然苟害於義又何多寡之


問乎孔子於公西赤之富不恤其請於原憲之貧不許其辭此知所與者也孟子言非其道則一簞食不可受於人如其道則舜受堯之天下不以為泰此知所取者也

愚謂夫子不許原憲之辭者以其為宰也非以其貧也

朱子曰朝廷設官未賢故在上者不當以請託而薦人
士人常有禮義廉恥故在下者不當自銜膺而求薦平

生守此愚見故為小官時不敢求薦後叨刺舉亦不敢
舉削應副人情官吏亦不敢挾書求薦其在閑官非無
親舊在官亦未嘗敢為人作書求薦惟老成淹滯實有
才德之人衆謂當與致力者乃以公論告之耳

官卑祿薄雖不快意然比之一介寒士以教學仰食於
人者則以為泰矣若以為不足妄有覬覦恐所得無幾
而終日之悔將有不可追者



西山讀書記卷三十四下